

Ang Kalibog diha sa Kinasang-an sa Dalan

KATUYOAN : Sa pagpakita nga ang sala angay pagahinulsolan aron mahibalik ang panaghiusa.

Asa man ang imong pilion, ang adlaw o gabii? Kadaghanan nato gusto ug adlaw, ngano man? Tungod kay gusto nato nga makit-an ang dapit nga atong pagaadtoan ug makit-an ang atong ginabuhar ingon man ang ginabuhar sa uban. Kaninyo nga nakagusto sa gabii, sultihi ako niini, magustohan ba kaha ninyo kon wala gayu'y bulan o bitoon? Tingali dili, kay walay katahum ang kagabhion kon dili pa tungod sa kahayag nga anaa sa kalangitan ingon man usab walay katahum ang adlaw kondili pa sa kahayag sa adlaw.

Ang Biblia nag-ingon nga ang Dios mao ang kahayag ug diha Kaniya wala gayu'y kangitngit. 1-Juan 1:5. Ang kahayag mao kanunay ang nagpahinumdom kanato sa Dios ug sa iyang pagkamatarung ug ang kangitngit nagpahinumdom kanato kang Satanas ug sa iyang kadautan. Maoy tinguha sa Dios nga ang iyang mga anak maglakaw diha sa kahayag.

Atong tan-awon kon ang mga anak sa Dios nagalakaw ba sa kahayag o sa kangitngit human sa daku nga lunop. Ang lunop nagalaglag sa tanang mga dautang katawohan busa ang Dios naghatag kang Noe og mga bag-o nga mga balaod ug ang iyang panimuyo gipasukad diha sa maong mga bag-o nga tulomanon. Genesis 9:1-7. Si Noe gisultihan sa Dios nga iyang pagalupkon ang kalibutan, magmabungahon ug magdaghan. Genesis 9:1,7. Gipakaon na ang kame ingon nga dugang sa iyang pagkaon kay kaniadto mga bunga sa kahoy ug mga utanon lamang ang ipakaon. Genesis 9:3. Ang pagpatay kinahangian pagasilotan; kinabuhi pagabayran ug kinabuhi. Genesis 9:6

Ug ang Dios naghimo ug pakigsaad kang Noe nga dili na Niya pagalaglagon ang kalibutan pinaagi sa lunop aron sa paglaglag sa tanang may kinabuhi sa nawong sa yuta ug gihatag ang bangaw ingon nga maoy nagpamatuod sa saad.

Si Noe ug iyang mga anak nga si Sem, Ham ug Japhet, gipanalanginan sa Dios samtang nagapadayon sila sa pagpanaw sa *DALAN SA KINABUHI*. Dali ra sila nga midaghan. Ang tanang katawhan nagasulti lamang sa usa ka pinulongan. Genesis 11:1

Ug sa human sa 1000 ka tuig aduna nay daghan kaayo nga mga katawhan sa kalibutan. Atong nahibaluan gikan pa sa sinugdanan nga kon asa gani ang daghan nga mga katawhan kasagaran anaa dinhi ang pagkadautan. Busa ingon usab niini ang nanghitabo human sa lunop. Nagsugod na sila sa pagsupak sa tanang mga balaod nga gihatag sa Dios ngadto kanila. Samtang sila nagapanaw gikan sa silangan nakakapiag sila ug patag sa yuta sa Shinar. Ug sila nanag-ingon: "Magbuhar kita ug tisa ug pagabagahon ta pag-ayo...magbuhar kita alang kanato ug usa ka siyudad ug usa ka torre..." Genesis 11:4. Kini nahimo nga diyos alang kanila kay ilang gibutang ang hulagway sa mga bitoon ibabaw sa torre. Gisimba nila ang binuhatan inay sa magbubuhar. Roma 1:19-25

Ang Dios nanaug aron sa pagtan-aw sa torre ug sa siyudad. Wala kini makapahimuot Kaniya. Iyang ipatlaag ang mga katawhan ug gilahugay ang ilang pinulongan ug gitawag ang dapit nga Babel nga nagkahulogan ug *pagkalibog*. Diha sa atong hulagway gitawag kini nato nga *PAGKALIBOG SA KINASANG-AN SA DALAN*. Genesis 11:5-9.

Unsa man ang pagabuhaton sa Dios karon? Ang kaliwatan nakapahimulos sa tanan nga kahigayonan apan pulos nangapakyas, busa gitalikdan sa Dios ang kaliwatan (*mga Gentil*) ngadto sa pagpakasala ug pagkadautan. Roma 1:24-28. Ang kaliwatan sa mga Gentil nagapadayon pagpanaw diha sa *KADALANAN SA MGA GENTIL* diha sa hulagway. Gipalabi sa tibook nga kaliwatan ang pagpili sa dalan nga matarung sa ilang mga mata apan napamatud-an nga mao kini ang dalan sa kamatayon.

Nganong gitawag kini nga dalan sa kamatayon? Atong tan-awon kon giunsa sa kaliwatan pagsupak ang paagi sa Dios pinaagi sa pagtoo. Sa pag-ingon nila nga, "Magbuhat kita ug tisa ug maghimo kita ug torre ilang gipalabi ang pagbuhat alang sa ilang kaugalingon nga himaya apan dili ang paghimaya sa Dios Kadaghanan usab sa mga katawhan karon nagahimo ug torre hinimo sa mga bato nga gitawag nila nga *maayong binuhatan* ug nagasalig giini nga maoy makadala kanila ngadto sa langit. Ang Dios mahimuot sa mga may pagtoo lamang.

Sa nanag-ingon sila: "Magbuhat kita ug atong kaugalingon nga ngalan," nagapaila nga dili sila gusto nga ang kadunganan ihatag ngadto sa ngalan sa Dios. Kon ang tawo magsimba sa iyang kaugalingon nagadala sa kalibog ug nagaputol sa panaghiusa sa Espiritu Santo.

Sa nanag-ingon sila: "Kay tingali kita unya pagapatlaagon," ila nga gipakawalay bili ang sugo sa Dios. Ang pagkamasinupakon nagadala sa katawhan ngadto sa kalibog ug paghukom.

Sa sunod nato nga panaw moliko kita dinha sa wala sa *KALIBOG SA KINASANG-AN SA DALAN* sa atong hulagway ug atong makita nga ang Dios nagtawag ug usa ka tawo aron magsugod sa bag-o nga tikang diha sa *DALAN SA SAAD*.

Nagalakaw na ba ikaw diha sa kahayag? Kon wala pa nimo dawata si Jesu-Cristo ingon nga imong Manluluwas, dawata Siya karong adlaw. Ang dugo ni Jesu-Cristo, ang anak sa Dios, nagahinlo sa tanan natong kasal-anan. Kon ikaw Cristohanon na, isugid ang imong mga sala ngadto Kaniya ug siya magapasaylo kanimo ug magapabalik kanimo sa pakighiusa uban Kaniya.

SAG-ULOHON : 1 Juan 1:7. Apan kon kita magalakaw diha sa kahayag, maingon nga Siya anaa sa kahayag, nan, kita may pakig-ambitay ang usa sa usa, ug ang dugo ni Jesus nga Iyang Anak nagahinlo kanato gikan sa tanang sala.

PAGTULON-AN 5 - PAGATUBAGON

1. Pagsulat og tulo ka mga bag-o nga mga balaod nga gihatag sa Dios ngadto kang Noe. Genesis 9:1-7 _____

2. Wala dangti og dugay napuno pagbalik sa katawhan ang kalibutan. Pila ka mga pinulongan ang ilang ginasulti? Genesis 11:1 _____
3. Unsa man ang gibuhat sa mga katawhan sa diha nga miabot sila sa kapatagan sa yuta sa Shinar? Genesis 11:2-4 _____
4. Unsa man ang gibuhat sa Dios sa mikanaug Siya sa pagtan-aw sa siyudad ug torre? Genesis 11:5-8 _____

5. Ang Dios wala mahimuot tungod kay ang mga katawhan miingon: "Magbuhat kita _____ ka lungsod ug torre." alang sa paghimaya sa ilang kaugalingon dili sa Dios. Genesis 11:4
6. Miingon usab sila: "Ug kita magbuhat _____ Ug usa ka ngalan." Genesis 11:4
7. Ang ngalan sa torre gitawag ug _____ Kay didto gilahugay ni Jehova ang sinulitihan sa tibook nga yuta. Genesis 11:9
8. Ang mga katawhan wala magalakaw diha sa kahayag ug busa wala silay _____ usa ug usa, o uban sa Dios. 1 Juan 1:7
9. Basaha ang Mga Taga-Roma 1:24, ug isulat ang duha ka pulong nga gibuhat sa Dios mahitungod sa mga Gentil human sa ilang daku nga pagsupak. _____

10. Isulat ang 1 Juan 1:7 nga sinag-ulo. _____

NGALAN _____

PINUY-ANAN _____

KUHA _____